

Här Claude Wiseler

President vun der Chamber

Lëtzebuerg, de 13. Februar 2025

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Educationnsminister weiderzeleeden.

Déi berufflech Ausbildung spillt eng essenziell Roll an der Formatioun vun eisem Nowuess an der lëtzebuerger Wirtschaft. Allerdéngs weisen Zuelen aus verschiddene Beräicher drop hin, datt eng net onwesentlech Unzuel vun Auszubildenden hir Ausbildung virzäiteg ofbrécht an et och schwéier ass fir Jonker ze fannen déi eng Léier am Handwierk wëllen ugoen.

Et fält op, dass onsen Informatiounen no, dëst am Zesammenhang mam enger alarmanter Zuel vu Schoulofbrieche a verschiddenen Lycée'e steet. Dëst ass deelweis drop zrëckzeféieren, dass d'Schüler an der Formation professionnelle oft Schwierigkeeten hunn e Patron de stage ze fannen an doduerch och keng Coursë beleee kënnen.

Esou wéi et aus engem Artikel vun der Süddeutsche Zeitung ervirgeet, schéint de Problem och bei onsen däitschen Noperen ze bestoen. Wou fréier ze vill Léit no enger Léier gesicht hunn, fält aktuell op, dass et ze vill Platze fir wéineg Undrang ginn. Et kënnt en demographeschen Aspekt dobäi, nämlech dass et manner jonk wéi eeler Mënsche ginn an déi Jonk sech doduerch d'Fräiheet och kennen huelen „Nee“ ze soen.

Dëst werft Froen op iwwert d'Attraktivitéit vun der dualer Ausbildung, d'Konditiounen an de Betriber an d'Mesuren, déi geholl gi fir d'Beruffsausbildung méi attraktiv ze maachen.

An deem Kontext wëilt ech folgend Froen un den Här Educationnsminister stellen:

- Wéi vill Ausbildungsverträge goufen zënter 2019 all Joer virzäiteg zu Lëtzebuerg opgeléist?
- Huet de den Educationnsminister Kenntniss iwwert déi global Unzuel vun Schoulofbrieche seit 2019 (opgeschlüsselt pro Joer)?
- Wat sinn d'Hauptgrënn fir dës Oofbréch? Gëtt e Suivi gemaach?
- Wat fir Moosnamen huet den Educationnsministère an de leschte Joren ëmgesat oder geplangt, fir d'Attraktivitéit vun der berufflecher Ausbildung ze erhéijen?
- Gëtt et eng Analyse iwwert d'Qualitéit an d'Konditiounen an de Léierbetriber?

Här President, ech bieden Iech dës Froen, mat mengem déifste Respekt unzuhuelen.

Marc Spautz

Députéierten

A handwritten signature in black ink, appearing to read 'M. Spautz', written over a horizontal line.



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 1935 vum honorabelen Deputéierte Marc Spautz

Ad 1)

<i>Schouljoer</i>	<i>Unzuel u Léierveträg, déi opgeléist goufen</i>
2019-2020	952
2020-2021	966
2021-2022	1.061
2022-2023	1.053
2023-2024	1.044

Ad 2)

Déi global Unzuel vun de Schoulofbrieche gëtt fir all Schouljoer am Rapport *Jeunes décrocheurs et jeunes inactifs au Luxembourg* publizéiert. Opgeschlësst pro Joer presentéiert sech d'Situatioun op follgend Manéier:

- 2019/2020: 1.473 Schoulofbrieche bei 21.155 Schüler ouni Schoupflicht → Taux: 7,0 %
- 2020/2021: 1.746 Schoulofbrieche bei 21.249 Schüler ouni Schoupflicht → Taux: 8,2 %
- 2021/2022: 1.767 Schoulofbrieche bei 21.807 Schüler ouni Schoupflicht → Taux: 8,1 %
- 2022/2023: 1.716 Schoulofbrieche bei 22.558 Schüler ouni Schoupflicht → Taux: 7,6 %
- 2023/2024: 1.884 Schoulofbrieche bei 22.973 Schüler ouni Schoupflicht → Taux: 8,2 %

D'Europäesch Kommissioun huet den Zilwäert fir d'Schoulofbréch op ënner 9 % fixéiert. Laut *Eurostat* louch den europäeschen Duerchschnitt am Joer 2023 bei 9,8 %.

Den nächste Rapport *Jeunes décrocheurs et jeunes inactifs au Luxembourg* iwwert d'Schouljoer 2023/2024 wäert ugangs Mee erauskommen. Mat deem Rapport wäert och eng méi detailléiert Analys vum Schoulofbroch virleien, fir ze verstoen, firwat den Taux eropgaangen ass.

Ad 3)

D'Hauptgrënn fir d'Schoulofbréch sinn och am Rapport *Jeunes décrocheurs et jeunes inactifs au Luxembourg* dokumentéiert. Déi dräi meeschtgenannte Grënn vun de Jonken, déi d'Schoul oder hir Ausbildung ofbriechen, sinn:

1. „Ech hunn een neie schoulesche Projet am Ausbléck.“
2. „Ech hunn een neie beruffleche Projet am Ausbléck.“
3. „Ech hunn kee Léierbetrib / keng Beruffsschoul fonnt.“

Fir dës Schoulofbréch ze begleeden, gëtt e strukturéierte Suivi duerchgefouert:

- Wann e Schüler net méi schoulflichteg ass a mat der Schoul ophale wëll, muss hien eng *Fiche de désinscription* a sengem Lycée ufroen.
- Ier dës Fiche ausgestallt gëtt, gëtt dem Jonken e Gespréich mam Service psycho-social et d'accompagnement scolaires (SePAS) ugebueden. Hei gëtt ënner anerem analyséiert, wat d'Grënn fir d'Ofbrieche sinn a wéi eng Alternativen existéieren.
- No dem Gespréich mam SePAS gëtt d'*Fiche de désinscription* ausgestallt, an den Austrëtt ass offiziell.

De weidere Suivi funktionéiert esou:

1. De Service de Coordination de la Recherche et de l'Innovation pédagogiques et technologiques (SCRIPT) erstellt all Mount eng Lëscht vu Jonken, déi de Schoulsystem ouni Diplom verlooss hunn.
2. De SCRIPT ënnerscheet tëscht zwou Kategorien:
 - Schüler déi schoulflichteg sinn; dës Schüler gi vun der Direction générale de l'enseignement secondaire kontaktéiert an ënnerstëtzt, fir zeréck an d'Schoul ze goen.
 - Jonker, déi net méi schoulflichteg sinn; dës ginn duerch d'Divisioun Soutien à la transition vers la vie active vum Service national de la jeunesse (SNJ) kontaktéiert.
3. De Suivi vum SNJ besteet aus verschiddenen Etappen:
 - Am Bréif, deem all betraffene Jonken, respektiv seng Elteren, wann e mannerjäreg ass, systematesch geschéckt kritt, bitt den SNJ eng Ënnerstëtzung un, fir en neie berufflechen oder schoulesche Projet ze definéieren. De Jonke kritt d'Méiglechkeet, e Rendez-vous an engem vun den 11 lokalen Antennen (Bureau) vum SNJ ze huelen.
 - Am Fall, wou de Jonken net op de Bréif reagéiert, geet den SNJ-Agent proaktiv op de Jonken duer (telefonesch, per SMS, E-Mail) a bitt iwwer déi verschidde Weeër Hëllef un.
 - De Jonken, deem d'Hëllef an Usproch hält, gëtt sou laang vun engem Agent betreit, bis eng Léisung fonnt gëtt. Dat kann e Retour an d'Schoul oder eng Ausbildung sinn, e Stage, eng Aarbecht oder eng Alternativ zur Inaktivitéit, wéi z. B. e Fräiwëllegendéngscht oder en Atelier vum SNJ.

Ad 4)

D'Promotioun vun der Berufsausbildung gëtt aktuell via d'*YEP!-Schoulfoire* an d'Promotioun vun de Beruffer duerch d'Maison de l'orientation gemach. Am Regierungsprogramm ass och eng Campagne commune fir d'Stärken vun der Berufsausbildung zesumme mat eise Partner virgesinn. Dës Campagne ass aktuell amgaang, ausgeschafft ze ginn.

Ad 5)

De Suivi vun der patronaler Ausbildung an de Formatiounen, déi ënner Léiervertrag oflafen, gëtt vun de Conseillers à l'apprentissage assuréiert. Och musse Betriber den „droit de former“ kréien, fir dierfen auszubilden. Dofir müssen si Konditiounen erfëllen, déi am Code du travail fixéiert sinn.

Lëtzebuerg, de 14. Mäerz 2025

De Minister fir Educatioun,
Kanner a Jugend

(s.) Claude MEISCH